

दिनांक 12.09.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- श्री सी.पी. राधाकृष्णन आज देश रा 15वां उपराष्ट्रपति रा तौर ऊं शपथ लीनी।
- प्रधानमंत्री नरेन्द्र मोदी कह्यो-ज्ञान भारतम् पोर्टल ऊं देश री जूनी ज्ञान सम्पदा ने बचायी जा सकेला।
- शिक्षा मंत्रालय समग्र शिक्षा अभियान सारू राजस्थान ने 580 करोड़ रुपया अर केन्द्रीय वित्त आयोग शहरी अनुदान रा तौर ऊं 541 करोड़ रुपया जारी कीना।
- प्रदेश मांय काल राख्यी जावण वाळी राष्ट्रीय लोक अदालत सारू 498 बेंच बणायी ज्यी-ऑनलाइन अर मौके मौजूद रह र सुणवाई करी जावेला।
- काल अर 14 सितम्बर ने ली जावण वाळी राजस्थान पुलिस कांस्टेबल भर्ती परीक्षा री सगळी तैयारियां पूरी व्ही।

000

श्री सी.पी. राधाकृष्णन देश रा 15वां उपराष्ट्रपति रा तौर ऊं आज शपथ लीनी। राष्ट्रपति द्रौपदी मुर्मू श्री राधाकृष्णन ने राष्ट्रपति भवन राख्यी ज्या जळसा मांय ओहदा री शपथ दिरायी।

ई मौके प्रधानमंत्री नरेन्द्र मोदी, पैली वाळा राष्ट्रपति रामनाथ कोविंद, पैली वाळा उपराष्ट्रपति जगदीप धनखड़ अर गृहमंत्री अमित शाह समेत केई केन्द्रीय मंत्री मौजूद रह्या। मुख्यमंत्री भजनलाल शर्मा ई कार्यक्रम मांय शामिल व्ह्या। श्री चंद्रपुरम पुन्नासामी राधाकृष्णन 4 मई 1957 ने तमिलनाडू मांय जन्म्या। वे कपड़ा ने दिसावर मांय बेचण रो कारोबार कामयाबी सागे बखूबी कीनो। पढ़ाई पूरी कर्या पाछे वे सरुआती दिनां मांय राष्ट्रीय स्वयं सेवक संघ ऊं जुड़ गया। श्री राधाकृष्णन साल 1996 मांय तमिलनाडू भाजपा रा सचिव री जिम्मेदारी संभाळी। 1998 मांय वे कोयम्बटूर ऊं सांसद चुण्यी ज्या। वे झारखंड अर महाराष्ट्र रा राज्यपाल रा तौर ऊं ई सेवा कीनी। उपराष्ट्रपति राधाकृष्णन अमेरिका, इंग्लैण्ड, फ्रांस अर जर्मनी समेत करीब 25 देशां री यात्रा कर चुक्या है। वे टेबिल टेनिस मांय कॉलेज रा चैंपियन अर लम्बी दूरी री दौड़ मांय ई भाग लेता रह्या। प्रधानमंत्री नरेन्द्र मोदी सोशल मीडिया रे जरिये बधाई संदेश मांय कह्यो के श्री राधाकृष्णन लोकतांत्रिक मूल्यां ने मज़बूत बणावण अर समाज सेवा सारू जिन्दगी लगा दीनी। प्रधानमंत्री श्री राधाकृष्णन ने कामयाब कार्यकाल री शुभकामनावां दीनी।

000

प्रधानमंत्री नरेन्द्र मोदी कह्यो है के ज्ञान भारतम् पोर्टल रे मार्फत भारत रा जूना ज्ञान ने बचायो जा रह्यो है। ई सागे ई मुश्किल ऊं मिलण वाळा ग्रंथां ने विद्वानां अर जनता सारू आसान बणाया जा रह्या है। प्रधानमंत्री आज नई दिल्ली मांय ज्ञान भारतम् अंतर्राष्ट्रीय सम्मेलन मांय बोल रह्या हा। वे कह्यो के ओ पोर्टल भारत री सांस्कृतिक अर बौद्धिक विरासत ने दुनिया सामी ले जावेला। श्री मोदी ग्रंथां मांय समायोड़ा दार्शनिक अर आध्यात्मिक ज्ञान री प्रासंगिकता रो ई जिक कीनो।

काल सरु व्ह्या तीन दिन रा ई सम्मेलन मांय पांडुलिपि विरासत ऊं देश री ज्ञान विरासत ने ओजू जीवित करण री कोशिश करी जा रही है। सम्मेलन मांय घणी मुश्किल ऊं मिलण वाळी पांडुलिपियां रो दरसाव करी ज्यो है।

000

शिक्षा मंत्रालय प्रदेश मांय समग्र शिक्षा अभियान सारु 580 करोड़ रुपया जारी कीना है, जद के केन्द्रीय वित्त आयोग ई शहरी अनुदान सारु 541 करोड़ रुपया जारी कीना है। इण ऊं शहर विकास अर स्कूली शिक्षा ने मजबूती मिलेला। मुख्यमंत्री भजनलाल शर्मा लारला दिनां केन्द्रीय आवासन अर शहरी कार्यमंत्री मनोहर लाल अर केन्द्रीय शिक्षा मंत्री धर्मेन्द्र प्रधान ऊं मुलाकात कर र ई बारा मांय अरज कीनी ही। मुख्यमंत्री ई रकम सारु केन्द्र सरकार रो आभार जतायो है। श्री शर्मा कह्यो के राज्य सरकार कार्ययोजना बणा र ई रकम ऊं दोन्यू हलकां मांय विकास ने तेज करेला।

000

अजमेर मांय आनासागर वैटलैंड माथे बणायी ज्यो सात अजूबां ने तोड़बा रो काम आज सरु कर दियो ज्यो। करीब साढे 11 करोड़ रुपया रा खर्च ऊं बणायी ज्यो ई पार्क ने सुप्रीम कोर्ट रा हुकम पाछे तोड़्यो जा रह्यो है। म्हाणी खबरनवीस बतायो के अजमेर विकास प्राधिकरण आ कार्यवाही कर रह्यो है।

000

वित्त मंत्रालय साल 2025-26 सारु नुवी अफीम नीति रो ऐलाण कर दीनो है। ई रा तैत बिना चीरा रा सीपीएस तरीका ऊं खेती मांय हर दस आरी 80 किलो ऊं कम डोडा देवण वाळा किसानां रा लाइसेंस निलंबित कर दिया जावेला। जो किसान लारला साल दस आरी माथे 90 किलोग्राम डोडा जमा कराया, वां ने ई साल चिराई रा पट्टा मिलेला।

000

ई साल री तीजी राष्ट्रीय लोक अदालत काल लगायी जावेला। राष्ट्रीय विधिक सेवा प्राधिकरण अर राज्य विधिक सेवा प्राधिकरण री ओर ऊं लगायी जावण वाळी अ अदालतां राजस्थान हाईकोर्ट री जोधपुर अर जयपुर पीठ समेत प्रदेश री न्यारी-न्यारी कचहरियां मांय लगायी जावेला। ई सागे ई राजस्व अदालतां, उपभोक्ता आयोगां अर दूजा प्रशासनिक अधिकरणां मांय ई लोक अदालतां लगायी जावेला। राजस्थान राज्य विधिक सेवा प्राधिकरण रा सदस्य सचिव हरि ओम अत्रि बतायो के राष्ट्रीय लोक अदालत मांय राजीनामा ऊं मामला निपटायी जावेला। ई सारु 498 बैच बणायी ज्यो है, ज्यां मांय ऑनलाइन अर मौके मौजूद रह र, दोन्यू तरीकां ऊं सुणवाई करी जावेला।

000

राजस्थान पुलिस कांस्टेबल भर्ती परीक्षा प्रदेश मांय न्यारी-न्यारी ठोडां काल अर 14 सितम्बर ने व्हेला। राजस्थान पुलिस भर्ती बोर्ड री ओर ऊं दस हजार रीता ओहदां माथे भर्ती सारु आ परीक्षा ली जा रही है। राजस्थान पुलिस मुख्यालय मांय भर्ती रो काम देख रह्या एडीजी विपिन पांडे खबरनवीसां ने बतायो के उम्मीदवारां ने परीक्षा रा तैय बगत ऊं कम ऊं कम दो घंटा पैली सेन्टर माथे पूगण बाबत् कही ज्यो है।

000

केंद्रीय आयुष राज्य मंत्री प्रतापराव जाधव आज सिरोही जिला रा माउंट आबू मांय माइंड-बॉडी मेडिसिन राष्ट्रीय सम्मेलन रो उद्घाटन कीनो। ब्रह्माकुमारीज संस्थान मांय राख्या जा रह्या चार दिन रा ई सम्मेलन रा उद्घाटन सत्र मांय श्री जाधव कह्यो के मौजूदा बगत तनाव ऊं भर्यो है, ऐड़ा हालात मांय आहार अर दिनचर्या ने संतुलित कर र योग अपना र जल्द स्वास्थ्य लाभ कर्यो जा सके है। श्री जाधव खबरनवीसां सागे बातचीत करता थका कह्यो के दुनिया मांय शांति सारु संस्थान री कोशिशों री सराहवणा कीनी। वे कह्यो के आध्यात्म ऊं जुड़ र केई भांत री लत ऊं बच्यो जा सके है।

000

जीएसटी ने युक्तिसंगत बणावणो स्वास्थ्य हलका माथे ई चोखो असर करेला। ओ फैसलो सगळां सारु सस्ती स्वास्थ्य सेवा री सरकार री सोच रो दरसाव करे है। डॉक्टरां, अस्पतालां अर उपचार

केन्द्रां री ओर ऊं दी जावण वाळी स्वास्थ्य सेवावां ने जीएसटी ऊं छूट दीरीजी है, जद के जरूरी दवाइयां अर ईलाज मांय काम आवण वाळा साज-ओ-सामान मांय जीएसटी री रेट 12 ऊं घटा र 5 फीसदी कर दीरीजी है। ई रे अलावा केई जरूरी दवाइयां माथे जीएसटी नी लागेला। टैक्स री रेट मांय कमी ऊं ईलाज रो खर्चो कम व्हेला। अ सुधार **“विश्व की फार्मेसी”** रा तौर ऊं भारत री भूमिका ने मजबूत बणावेला। राजस्थान केमिस्ट अलायंस रा अध्यक्ष अरविंद गुप्ता बतायो के जीएसटी कटौती ऊं जनता ने फायदो मिलेला अर मेडिकल उपकरण सस्ता व्हेला।

000

भरतपुर मांय गिद्धां ने बचावण सारू डब्ल्यू डब्ल्यू एफ अर वन विभाग केवलादेव राष्ट्रीय उद्यान अर बयाना री डूंगरियां माथे गिद्धां सारू सुरक्षित घर बणाया जा रह्या है। केवलादेव अभ्यारण्य रा उप वन संरक्षक मानस सिंह बतायो के अभियान रा पहला दौर मांय गिद्धां री तादाद री ठा करण सारू सर्वे कर्यो जावेला। ई सारू उद्यान मांय निगराणी केन्द्र बणायो जावेला। वे बतायो के ई हलका मांय लम्बी चोंच वाळा अर हिमालयन गिद्ध मिले है।

000